

## AUGLÝSING

### um staðfestingu félagsmálaráðuneytisins á byggingasamþykktum.

Samkvæmt lögum nr. 19 20. október 1905, um byggingasamþykktir, sbr. lög nr. 84 16. desember 1943, um breytingar á þeim lögum og Skipulagslög nr. 19 21. maí 1964, hefur ráðuneytið í dag staðfest byggingasamþykktir fyrir eftirgreind sveitarfélög:

1. Sauðárkrókskaupstað.
2. Hvalfjarðarstrandarhrepp í Borgarfjarðarsýslu.
3. Grindavíkurhrepp í Gullbringusýslu.
4. Eyrarhrepp í Norður-Ísafjarðarsýslu.

Byggingasamþykktir þessar eru í samræmi við fyrirmynd þá, sem félagsmálaráðuneytið hefur staðfest og birt með auglýsingu nr. 23/1967 í B-deild Stjórnartíðinda.

*Félagsmálaráðuneytið, 21. maí 1968.*

F. h. r.

**Hjálmar Vilhjálmsson.**

*Hallgrímur Dalberg.*

30. maí 1968.

Nr. 169.

## SAMÞYKKT

### um hagnýtingu bithaga, hagagjald og girðingargjald á Stokkseyrartorfunni.

#### I. KAFLI

#### Um girðingargjald.

##### 1. gr.

Stokkseyrarhreppur annast uppsetningu og viðhald á girðingu um beitiland Stokkseyrartorfunnar.

##### 2. gr.

Til þess að standast kostnað af girðingunni, greiðslu afborgana og vaxta af skuldum, sem á girðingunni hvíla, svo og kostnaði við viðhald girðingarinnar, skal hver maður, er býr á torfunni, sem ábúandi jarðar eða þurrabúðarmaður, sem er eigandi gripa eða kinda greiða girðingargjald af hverjum framtöldum grip, hrossum og sauðkindum, nema sannað sé að keyptur sé hagi fyrir það annars staðar, eða það haft í eigin girðingu.

##### 3. gr.

Niðurjafnað girðingargjald á hvert hross eða sauðkind skal, fyrir hvert ár, vera það hátt, að trygging sé fyrir því, að innheimt girðingargjald samtals nægi fyrir afborgunum og vöxtum af skuldum vegna girðingarinnar, ásamt viðhaldskostnaði hennar.

##### 4. gr.

Girðingargjald ákveðst árlega, af hreppsnefnd, með hliðsjón af framkvæmdaþörf hverju sinni.

## 5. gr.

Nú verður árlega niðurjafnaðri viðhaldsupphæð eigi varið allri til viðhalds girðingunni ár hvert, og skal þá leggja það fé, sem ónotað er, inn á sparisjóðsbók, ásamt eftirstöðvum af niðurjöfnun til greiðslu afborgana og vaxta, ef nokkrar verða.

## 6. gr.

Nú flytur ábúandi jarðar eða þurrabúðarmaður burtu af Stokkseyrartorfunni eða hættir að nota beit í landi torfunnar, og skal hann þá ekkert tilkall eiga til tiltölulegs hluta af niðurjöfnun til viðhalds eða inneigu girðingarinnar.

## 7. gr.

Niðurjöfnuð girðingargjöld skulu innheimt með fjallskilum, og er gjalddaginn 15. okt. ár hvert.

## II. KAFLI

## Um hagnýtingu bithaga og hagagjald.

## 8. gr.

Gripa- og sauðfjáreigendum á Stokkseyrartorfunni, aðrir en ábúendur jarða, (þurrabúðarmenn o. fl.), skulu greiða hagagjald fyrir hvern grip í landi torfunnar, samkv. vorframtali kr. 100.00 fyrir hvert hross og kr. 10.00 fyrir hverja sauðkind.

## 9. gr.

Sauðfé og hross má ekki hafa innan kaupsins frá og með 6. júní til Skeiðaréttadags, á öðrum tíma er heimilt að hafa gripi þessa innan kaupsins, enda ábyrgjast eigendur að gripirnir valdi ekki öðrum tjóni.

## 10. gr.

Nú fjölgar stórgripum og sauðfé bænda og þurrabúðarmanna á Stokkseyrartorfunni svo mikið að beutiland torfunnar reynist um of takmarkað og beit ófullnægjandi, og áskilur landsdrottinn sér þá rétt til að ákveða þá ítölu stórgripa og sauðfjár, sem hver gripa- og fjáreigandi má hafa í beutilandi torfunnar.

## 11. gr.

Óheimilt er búendum og þurrabúðarmönnum á Stokkseyrartorfunni að taka fé eða gripi af mönnum utan torfunnar til beitar í beutilandi hennar, án leyfis landsdrottins, skulu íbúar Stokkseyrartorfunnar jafnan sitja fyrir beit í beutilandi torfunnar meðan hún endist, og um semur við landsdrottinn.

## 12. gr.

Á hverju vori skal gera áætlun um hvað margar kýr verði reknar í kúabeutiland torfunnar, og skulu kúaeigendur annaðhvort fá einn mann til að sækja þær og reka eða skipta rekstrinum hlutfallslega niður eftir kúafjölda hvers eiganda. Óheimilt er að hafa nautgripi gæzlulausa á almannafæri innan kaupsins.

## 13. gr.

Rétti til hagbeitar í landi Stokkseyrartorfunnar fylgir fjörubeit, og gilda um fjörubeitina sömu reglur og um hagbeit eftir því sem við á.

Samþykkt þessi staðfestist hér með samkvæmt girðingalögum nr. 19 25. marz 1965, til þess að öðlast þegar gildi.

*Landbúnaðarráðuneytið, 30. maí 1968.*

**Ingólfur Jónsson.**

*Þorv. K. Þorsteinsson.*

24. maí 1968.

Nr. 170.

**Staðfesting forsetans** á skipulagsskrá fyrir Minningarsjóð Vigdísar Ketilsdóttur og Ólafs Ásbjarnarsonar, útgefin á venjulegan hátt að mandatum af dómsmálaráðherra, 24. maí 1968.

Skipulagsskráin er þannig:

## SKIPULAGSSKRÁ

fyrir Minningarsjóð Vigdísar Ketilsdóttur og Ólafs Ásbjarnarsonar.

## 1. gr.

Nafn sjóðsins er Minningarsjóður Vigdísar Ketilsdóttur og Ólafs Ásbjarnarsonar.

## 2. gr.

Stofnfé minningarsjóðsins er kr. 605 000.00, sem lagt er fram af Ásbirni Ólafssyni, stórkaupmanni, Reykjavík, og Ásbjörn Ólafsson, hf., Reykjavík.

Heimili Minningarsjóðsins er Reykjavík.

## 3. gr.

Tilgangur Minningarsjóðsins er að styrkja fátækt og efnilegt ungt fólk til náms, sem af sjálfdáðum hefur ekki án aðstoðar tækifæri til þess að afla sér menntunar. Styrkirnir skulu vera það riflegir, að þeir komi að tilætlunum notum, og geta sömu aðilar orðið styrksins aðnjótandi í mörg ár í röð.

## 4. gr.

Þegar farið verður að úthluta úr sjóðnum, ber að senda skriflega beiðni um styrkveitingar til stjórnar sjóðsins og skal umsækjandi láta getið um aldur og efnahaga og til hvers nota eigi styrkinn. Þá skal tekið fram að afhenda skal dómsmálaráðuneytinu afrit af reikningum sjóðsins árlega.

## 5. gr.

Höfuðstól minningarsjóðsins eins og hann er og verður á hverjum tíma má aldrei skerða. Heimilt er að hefja styrkveitingar úr sjóðnum nú þegar. Úthluta má styrkjum skv. 3. gr. fyrir allt að 80% af árlegum tekjum sjóðsins, en 20% þeirra leggst við höfuðstólinn.